

M310: Marien Himmelfahrt

0,1 der himel unde erde geschuof von nihte .
0,2 unde mit sîner kraft berihte .
0,3 swaz dâr über ist unde dâr under .
0,4 der kan noch manic wunter .
0,5 von nihte wole geschaffen .
0,6 alle die meisterpfaffen .
0,7 die . ie . gelegeten buoch vüre sich .
0,8 wurden nie sô künsten rîche .
0,9 joch en lebent niet noch hiute .
0,10 die eteswaz von niute .
0,11 gemachen kûnnen joch sô vile .
0,12 daz ich vüre wâr daz sprechen wile .
0,13 als ein kleine stuppelîn .
0,14 daz dâ vliuget in der sunnen schîne .
0,15 iz en tete danne der süeze Krist .
0,16 dem niht zuo tuonne unmügelich ist .
0,17 er kan von nihte machen vile .
0,18 unde entmachet swaz er wile .
0,19 den êrsten man daz êrste wîp .
0,20 er machete si als sîn selbes lîp .
0,21 gebiledet Even unde Adâmen .
0,22 von der zweier sâmen .
0,23 sîn wir alle sament kumen .
0,24 swie ungelîche zuo genomen .
0,25 der sâme an kreften habe .
0,26 ime gienc ane deme êrsten abe .
0,27 der stam der êrsten mennischen diet .
0,28 ane deme aneginne misseriet .
0,29 wande Eva gotes gebot verkôs .
0,30 unde uns daz paradîse verlôs .
0,31 Kain sluoc Abelen tôt .
0,32 sînen bruoder âne nôt .
0,33 dâ von die vruht der reinen art .
0,34 ane deme êrsten teile unertic wart .
0,35 hier mite nam die werlt zuo .
0,36 mit swachheite leider alzuo vruo .
0,37 daz got der werlte wart gevêch .
0,38 wande si zuo boeseren hant gedêch .

0,39 er ertrankte waz dâ was .
0,40 alsô daz nieman dâ genas .
0,41 der werlte keiner slahte .
0,42 biz an Nôê selp ahtode .
0,43 drî süne unde sîn selbes lîp .
0,44 dâr zuo ir iegelîches wîp .
0,45 die wurden alle vore der sintvluot .
0,46 in der arken wole behuot .
0,47 dô daz wazzet dâ zuorvlôz .
0,48 die kleine werlt wart aber grôz .
0,49 unde missegienc ir aber als . êr .
0,50 wande der alte Nôê .
0,51 vervluochete sîneme sune Ham .
0,52 der ime den gêren abe nam .
0,53 unde in liez ligen alsô bar .
0,54 unde wîsete sîne brüeder dar .
0,55 Sem unde Japhet .
0,56 die schulden in daz er ez tet .
0,57 durch den grôzen ungelimpf .
0,58 daz er sô schamelîchen schimpf .
0,59 ûfe sînen vater treip .
0,60 dâ von ouch ime der vluoch bekleip .
0,61 unde den die sider quâmen .
0,62 von Ham unde sînen sâmen .
0,63 dâ von ouch iemer sîn art .
0,64 genideret unde gedrucket wart .
0,65 von dem ungetriuwen Ham .
0,66 swaz aber von sînen bruoderen quam .
0,67 zuo werdicheit sich daz gezôch .
0,68 iz wart edele unde hôch .
0,69 alsus die vervluochete diet .
0,70 sich von den tugenthaften schiet .
0,71 die boesen muosten under gân .
0,72 unde den guoten werden undertân .
0,73 dô wart die werlt alsô gestalt .
0,74 daz eine geslehte mit gewalt .
0,75 die anderen twanc mit grôzer kraft .
0,76 daz sie in wurden dienesthaft .
0,77 sus wurden zwei geslehte .
0,78 einez vrî daz ander knehte .
0,79 daz eine – starc daz ander schwach .
0,80 von Nôês vluochenne daz geschach .
0,81 waz sal ich dâ von sagen mêr .
0,82 von Adâm biz an Nôê .
0,83 stuont der êrste werltstam .
0,84 unde dâ von Nôê biz an Abraham .
0,85 von Abraham dâ muoste stên .
0,86 die werlt biz an Moisen .

0,87 von Moisen biz an die diet .
0,88 die got von Babilônien schiet .
0,89 unde vuorte durch daz rôte mer .
0,90 dô stuont daz babilonische her .
0,91 vürebaz sînes alters zît .
0,92 biz an den edelen küninc Dâvît .
0,93 der wuohs von sîner blüejenten – jugent .
0,94 ûf unde ûf mit ganzer tugent .
0,95 er was ein hôch prophête .
0,96 von gote er wîsheit hæte .
0,97 swaz sider her von sîner art .
0,98 unde von sîneme geslehte geboren wart .
0,99 die sint noch in der jüdischheit .
0,100 von hêrres Dâvîdes edelkeit .
0,101 geboren hoeric verre mêr .
0,102 danne dechein geslehte in der alten . ê .
0,103 dô stuont die werlt von Dâvît .
0,104 biz an der sæligen künfte zît .
0,105 daz Jêsus Christus selbe quam .
0,106 der uns den êwigen tôt benam .
0,107 er wart von einer maget geboren .
0,108 die er zuo muoter hât erkoren .
0,109 er wolte sîn ires lîbes vruht .
0,110 durch die reine kiusche zuht .
0,111 die got an ir bekante .
0,112 dô er von himel sande .
0,113 sînen sun in iren lîp .
0,114 in die reine maget niet ein wîp .
0,115 wie reine kiusche muoste sîn .
0,116 des muoterlîches kindes schrîn .
0,117 dâ inne der vile reine lac .
0,118 der kein unreinede lîden mac .
0,119 Maria al der werlte wünne .
0,120 von Dâvîdes künne .
0,121 von Jesse die ruote .
0,122 vile wünnicliche erbluote .
0,123 zuo sælden der kristenheit .
0,124 si bluote ûzer der jüdischheit .
0,125 sie reine wolegeborene .
0,126 sam die rôse ûzer dem dorne .
0,127 des kindes des die maget genas .
0,128 ire vater unde ire sun iz was .
0,129 unde si sîn tochter unde sîn muoter .
0,130 ei süezer got vile guoter .
0,131 sît dû von sînen vater hêr .
0,132 gegen der erden tæte kêr .
0,133 unde mennischlich ûzer der erden .
0,134 ein mennische geruochte werden .

0,135 doch sun der mennische sâmen gar .
0,136 swie ein mennische dich gebar .
0,137 dû vaterhalbe niet mennischen kint .
0,138 von engels Worten ein geistlich wint .
0,139 in dîner muoter vrûhtic wart .
0,140 daz von des Wortes învart .
0,141 dû muoterhalben würde .
0,142 mennischlich kint unde vleischlîche bûrde .
0,143 unde dich die reine maget hêr .
0,144 gebar mennischlîche sunder sêr .
0,145 unde sît dû des geruochte gar .
0,146 von mennischen dîne nar .
0,147 nemen dîne spîse .
0,148 unde in mennischlîcher – wîse .
0,149 von muoterlîcher spünne .
0,150 vleisch unde bluot gewünne .
0,151 unde sît dû reiner vater guot .
0,152 daz selbe vleisch daz selbe bluot .
0,153 den reinen lîp daz hêre leben .
0,154 geruochte deme tôde ergeben .
0,155 vûre unser aller schulde .
0,156 unde uns dînes vateres hulde .
0,157 sô marterlîche erwûrbe .
0,158 daz dû vûre uns erstûrbe .
0,159 unde erloesete alsô tiure .
0,160 uns dîn arme crêatiure .
0,161 von der êwiclîchen nôt .
0,162 die âne dînen hêren tôt .
0,163 niemer mohte sîn gewant .
0,164 sô sîs dû sûezer got gemanet .
0,165 der werltlîcher triuwen .
0,166 daz dû von helleriuwen .
0,167 uns vaterlîche koufete dô .
0,168 daz wir dînes koufes werden vrô .
0,169 an der ôsterlîchen zît .
0,170 sô an dîneme koufe lît .
0,171 beide gewin unde verlust .
0,172 wan verliures dû danne dînes lîbes kust .
0,173 an den die dîne hantgetât .
0,174 zuo kinde dir geschepfet hât .
0,175 unde heizen dîne kint .
0,176 unde in dîneme namen sint .
0,177 beide genamet unde getoufet .
0,178 sô hætēs dû niet wole gekoufet .
0,179 sît dû bist Krist unde wir sîn kristene .
0,180 sô müezest dû uns gevrîsten .
0,181 hêrre vater dîne kint .
0,182 die nâch dir genennet sint .

0,183 unde lâz uns daz erwerben .
0,184 . êr danne wir ersterben .
0,185 durch die heiligen namen drî .
0,186 daz niet an uns verloren sî .
0,187 die grôz arbeit dînes sunes .
0,188 iz stirbet nieman mêr durch uns .
0,189 der uns loese alsô tiure .
0,190 dô der vile ungehiure .
0,191 hellewolv verirrte .
0,192 dîne schâf dir hirte .
0,193 dû volgete im biz in sîn hol .
0,194 unde loesete sie nû hûete wole .
0,195 hirte dîner herten .
0,196 uns lâget der ie gerte .
0,197 mit vîantlîcher – begire .
0,198 wie er daz verzûcke dir .
0,199 daz dîn rihtlich eigen ist .
0,200 dâ beschirme uns vûre Jêsus Krist .
0,201 durch die maget lichtgevar .
0,202 die dich zuo schirmære uns gebar .
0,203 durch die selbe kûninginne .
0,204 ich disses mæres aneginne .
0,205 wile brengen zuo eineme orte .
0,206 nâch der schrifte worte .
0,207 der sûeze got vile hêre .
0,208 der dem guoten sancte Severe .
0,209 sande den vile heiligen geist .
0,210 mit einer tûben zuo volleiste .
0,211 daz er der heiligen schrifte hort .
0,212 beide tâten unde wort .
0,213 schône sanc unde las .
0,214 des er niet gelêrt was .
0,215 der sende mir ouch solichen sin .
0,216 wande ich niet sô sinnic bin .
0,217 daz ich von mîn selbes kunst .
0,218 sunder gotelichen gunst .
0,219 mich disses mæres underwinte .
0,220 von Marien sancte Annen kinde .
0,221 wie daz ire sun mit ir gewarp .
0,222 zuo irem ende dô sie starp .
0,223 unde wie die engele nâmen .
0,224 iren reinen lîchamen .
0,225 unde vuorten in vile schône .
0,226 gegen deme hôhen trône .
0,227 dâ got in sîner majestât .
0,228 die sûeze maget gekroenet hât .
0,229 des wile ich iuch bescheiden gar .
0,230 nimet mîn gotes helfe war .

0,231 dô got durch unser aller nôt .
0,232 sîn selbes leben vüre uns bôt .
0,233 unde bluotente an dem kriuze stuont .
0,234 an vuozen unde an henden wunt .
0,235 unde an der sîten eneben .
0,236 unde lützel langer solte leben .
0,237 unde ime daz volc was entwichen .
0,237a –[...]
0,238 ein urhap aller vröuweden gar .
0,239 doch vröuweden unde trôstes bar .
0,240 Maria die vile guote .
0,241 mit trûrigen muote .
0,242 mit nâhegêndem smerzen .
0,243 ires jâmer berenten herzen .
0,244 mit muoterlîcher triuwen .
0,245 zôch sie mit siufzenne riuwen .
0,246 in ire herze alsô vaste .
0,247 daz sie von jâmers laste .
0,248 unde von grôzer herzeswære .
0,249 aldâ gevallen wære .
0,250 wen daz der heilige man .
0,251 ire swestersun Johan .
0,252 diu vile vröuweden arme .
0,252a –[...]
0,253 dô stuont die senderîche .
0,254 Maria jæmerlîche .
0,255 unde sach iren sun in grôzer nôt .
0,256 dâ von ire herze in jâmer sôt .
0,257 sie sach iren sun vile hêren .
0,258 sînes herzen bluot verrêren .
0,259 daz ûz sînen wunden gôz .
0,260 unde sîne sîten nider vlôz .
0,261 mit jâmers klage si – dô sprach .
0,262 ô wê mir hiute unde iemer ach .
0,263 waz hân ich leides vunden .
0,264 zuo disen leiden stunten .
0,265 ô wê herze nû verswint .
0,266 wie hanget hier mîn einic kint .
0,267 in sô jæmerlîcher nôt .
0,268 ô wê mir daz mich der tôt .
0,269 vürebaz iemer mêr gespart .
0,270 wê mir daz ich ie wart .
0,271 waz gêt mir herzeleides zuo .
0,272 war sol ich arme dierne nû .
0,273 ich aller vröuweden lære .
0,274 unde vol herzielîcher swære .
0,275 waz sol nû herzelieber sun .
0,276 dîne vile arme muoter tuon .

0,277 die trôstlôs hier vore dir stât .
0,278 sunder helfe sunder rât .
0,279 ô wê dirre stunten .
0,280 unde wê mir dirre wunden .
0,281 ô wê daz ich ie gebar .
0,282 kint . unde bin doch kindes bar .
0,283 wâfen über der juden diet .
0,284 unde über den der dich verriet .
0,285 wie hânt sie dich gemartelt sus .
0,286 ei herzer sun Jêsus .
0,287 wie mich dîn grôzer smerze .
0,288 snîdet in mîn herze .
0,289 sît ich von êrst dîn muoter wart .
0,290 sô en hât mich angest niet gespart .
0,291 ich en vorhte ie dînes tôdes .
0,292 dô dich der küninc Herôdes .
0,293 verderben wolte unde sîn gewalt .
0,294 des manic muoterbarn entgalt .
0,295 die er alle gemeine .
0,296 hiez toeten durch dich aleine .
0,297 waz leit ich angest dô durch dich .
0,298 des ich dô vorhte des hân ich .
0,299 ein leidez ende vunden hier .
0,300 ich en wart es âne sorge nie .
0,301 ô wê der missewende .
0,302 wie bluotent dîne hende .
0,303 dîn sîte unde dîne vüeze .
0,304 ei herzesun vile süeze .
0,305 wie hâte ich dich sô zarte gezogen .
0,306 die bruste die dû hâst gesogen .
0,307 hânt ein trûric herze bedaht .
0,308 hâs dû noch sprechennes keine maht .
0,309 herzeliebe sun sô sprich .
0,310 tuo ûf dîn ougen unde sich .
0,311 mich armen Marien .
0,312 dîne muoter schrîen .
0,313 unde gip mir trôst des darf ich wole .
0,314 ich en weiz nû leider war ich sol .
0,315 anders trôstes en hân ich niet .
0,316 dû wære al mîn zuoversiht .
0,317 weme læzes dû mich nû .
0,318 herzesun nû sprich mir zuo .
0,319 ein einic wort durch dîne güete .
0,320 daz erquicket mîn gemüete .
0,321 dô sus die sorgen rîche .
0,322 stuont klagente jæmerlîche .
0,323 unde zôch mit siufzenne manigen sûf .
0,324 Jêsus swanc die ougen ûf .

0,325 unde sach die lieben muoter sîn .
0,326 mit jâmers klagen dulten pîne .
0,327 der riuwen den die muoter leit .
0,328 dem sune niuwe wunden sneit .
0,329 mit jâmer durch sîn herze .
0,330 sô daz sîn selbes smerze .
0,331 den sîn martel dâ entvienc .
0,332 ime unnâch alsô nâhe gienc .
0,333 joch meinen ich sîn selbes tôt .
0,334 als die jâmer bernte nôt .
0,335 die er an sîner muoter sach .
0,336 erbermiclîche er dô sprach .
0,337 “muoter habe guoten trôst .
0,338 dû wirdes trûrennes schiere erlöst .
0,339 dise nôt die ich nû hân .
0,340 sal dir zuo vröuweden ûz ergân .
0,341 herze muoter weine niet .
0,342 grôze vröuwede dir schiere geschiet .
0,343 Johan der dâ stêt der sî dîn sun .
0,344 er sol dir sunlîche tuon .
0,345 biz an den sældeberenden tac .
0,346 daz ich dich trôstes weren mac .
0,347 der âne ende dich machet vrô .”
0,348 zuo sancte Johanne sprach er dô .
0,349 “Johan dâ stât dîn muoter .
0,350 lieber vriunt vile guoter .
0,351 sie sî dîn muoter unde dû ire kint .
0,352 mit triuwen dû dich ir underwint .
0,353 tuo dîne triuwe an ir schîn .
0,354 si sol in dîner huote sîn .
0,355 sô lange biz ich ir hân bereit .
0,356 endelôse sælicheit .
0,357 dâ sie des himeles krône .
0,358 in mînes vateres trône .
0,359 bî sîner zeswen hende .
0,360 tragen sal âne ende .”
0,361 der reine êwangeliste .
0,362 daz niet langer vriste .
0,363 er tet daz ime got gebôt .
0,364 swer nû die jâmer berente nôt .
0,365 unde die swære herzesêr .
0,366 des kindes unde der muoter hêr .
0,367 wile wizzen wie die wære .
0,368 dô die vile riuwebære .
0,369 mit jâmers ougenweide .
0,370 sach ire einigez kint verscheiden .
0,371 mit solicher wunden smerzen .
0,372 der denke in sîneme herzen .

0,373 wie ime zuo muote wære .
0,374 zuo solicher herzeswære .
0,375 ob ime daz leit geschæhe .
0,376 daz er vore sînen ougen gesæhe .
0,377 sîn kint in solichen noeten .
0,378 sô jâmerlîche tôten .
0,379 unde mohte doch ime kein helfe tuon .
0,380 alsus stuont ouch Marîen sun .
0,381 unde leit den tôt zuo ire anegesihte .
0,382 unde sie ime doch mohte gehelfen niet .
0,383 ouch was die liebe mêrer .
0,384 die siu unde unser hêrre .
0,385 zuosamene truogen under in .
0,386 danne mennischen herze unde sin .
0,387 iemer mohte ertrahten .
0,388 erdenken unde erahten .
0,389 der herzenlieben lûterkeit .
0,390 diu grôzer was ire herzeleit .
0,391 dô in zuo scheidenne geschach .
0,392 dô ime der tôt sîn herze brach .
0,393 unde was der reine sûeze man .
0,394 ire swestersun Johan .
0,394a wærlîche vol des riuwen
0,395 durch diu klârheit sîner triuwen .
0,396 durch sîner muomen jâmerkeit .
0,397 unde durch die nôt die Jêsus leit .
0,398 wie Jêsus martel dâ geriet .
0,399 unde wie er von lebene schiet .
0,400 unde ouch wie er begraben wart .
0,401 sîn ûferstant sîn himelvart .
0,402 dâ von en sagen ich iuch niet mêr .
0,403 ir hât ez wole vernomen êr .
0,404 aller sælden urhap .
0,405 Maria volgete ime in daz grap .
0,406 daz sie sich nie von ime schiet .
0,407 durch angest von der juden diet .
0,408 grôz angest doch die juden twanc .
0,409 daz sie mit zwîvel wurden kranc .
0,410 an deme gelouben algemeine .
0,411 sie vluchen alle wan aleine .
0,412 die reine maget junge .
0,413 ires herzen vestenunge .
0,414 truoc des gelouben sterke .
0,415 sunder zwîveles merke .
0,416 der deme gelouben tete schâch .
0,417 des volgete sie ime alles nâch .
0,418 die getriuwe unde ouch die reine .
0,419 sie wiste daz aleine .

0,420 waz künftlicliche solte ergân .
0,421 wie ire sun solte erstân .
0,422 si wiste ouch wole sîn himelvar .
0,423 durch daz an ir bevestenet wart .
0,424 des gelouben urhap .
0,425 sie was der jungeren leitestap .
0,426 ir aller geloube an ir bestuont .
0,427 die gotes kraft was ir wole kunt .
0,428 nû lâzen wir verlîben daz .
0,429 unde vernemet vûrebaz .
0,430 von disen jâmers sachen .
0,431 sollen wir vröuwede machen .
0,432 Johan Marien vuorte hine .
0,433 riuwe unde triuwe vuor mit in .
0,434 von grôzeren kiuschen nieman saget .
0,435 dâ vuorte ein maget ein ander maget .
0,436 der kristenheite spiegelglas .
0,437 Johan ein reine maget was .
0,438 kiusche unde reine .
0,439 bewart vore aller meine .
0,440 sîn liebe er an – – in wande .
0,441 wan in got reine erkante .
0,442 ouch was die rôsebluome .
0,443 Maria Johannis muome .
0,444 durch die sippe unde durch die reinede .
0,445 in got vile tiure meinte .
0,446 als an sîner heilicheit wole schein .
0,447 der vier êwangelisten ein .
0,448 unde ein apostolus was er .
0,449 den got durch sînes herzen ger .
0,450 unde durch rehte liebe gelust .
0,451 slâfen liez ûf sîner brust .
0,452 dô sach er gotes tougene .
0,453 mit vleischlîchen ougen .
0,454 durch dise grôze minne .
0,455 di hêre kûninginne .
0,456 bevalh ime got der guote .
0,457 die nam er in sîne huote .
0,458 der guote sancte Johan .
0,459 unde vuorte sie mit ime dannen .
0,460 ein berc heizet Olivet .
0,461 dâ vile der ôleboume stêt .
0,462 dar vuorte er sie die rehte .
0,463 dâ wonete sîn geslehte .
0,464 er bevalh sie sînen vriunden dâ .
0,465 sie was dâ baz danne anderswâ .
0,466 sie wâren alle ire künfte – vrô .
0,467 unde hielten sie mit zûhten sô .

0,468 als ez ire êren wole gezam .
0,469 unde sie ez zuo danke von in nam .
0,470 dô was die maget junge .
0,471 in reiner handelunge .
0,472 âne alle missewende .
0,473 biz an ires lîbes ende .
0,474 dô hæte ouch got verwunden .
0,475 die nôt von sînen wunden .
0,476 unde allez daz volendet .
0,477 dâr umbe er wart gesendet .
0,478 von sînen vater her nider .
0,479 zuo dem was ouch er hin wider .
0,480 ûf in daz himelrîche kumen .
0,481 unde hæte den sigen hier genomen .
0,482 unde hæte wîtene gesant .
0,483 sîne apostele in die lant .
0,483a –[...]
0,484 wart iegelîcheme dâ bekant .
0,485 swar sie hine kêrten .
0,486 daz sie bredigeten unde lêrten .
0,487 den kristengelouben .
0,488 daz half in got betouben .
0,489 mit dem heiligen geiste .
0,490 den sande er in zuo volleiste .
0,491 war iegelîcher quæme .
0,492 welich lant er an sich næme .
0,493 die niuwen . ê . zuo lêrnne .
0,494 unde die kristenheit zuo mêrnne .
0,495 daz lâzen wir belîben hier .
0,496 unde sagen vürebaz wie .
0,497 wie lange di maget êrbære .
0,498 bî Johannis vriunden wære .
0,499 die reine süeze maget klâr .
0,500 vierzehen wochen . unde ein jâr .
0,501 unde vürebaz an den vünften tac .
0,502 unde jâmers ûf der erden pflac .
0,503 sît daz er ûf zuo himel vlouc .
0,504 Jêsus der ire brüste souc .
0,505 di wîle dûhte sie zuo lanc .
0,506 wande ire herze in sorgen ranc .
0,507 wie siu gesæhe ire einic barn .
0,508 von dem siu trûric was gevarn .
0,509 eines tages daz geschach .
0,510 daz des kindes minne brach .
0,511 der muoter in ires herzen schrîn .
0,512 sô daz die hêre kûninginne .
0,513 von jâmers hitze wart entzunt .
0,514 sô daz ires herzen burnen grunt .

0,515 ûf wallen muoste unde über vlôz .
0,516 vile heizer trehene der jâmer gôz .
0,517 dâ von ire liechten ougen klâr .
0,518 daz müget ir wizzen vüre wâr
0,519 unde ire wangen wurden naz .
0,520 heize weinende si gesaz .
0,521 an einer heimeîichen stat .
0,522 aldâr siu von den liuten trat .
0,523 mit andâht siu zuo himel sach .
0,524 siu want ire hende unde sprach .
0,525 “ei vater unde hêrre mîn .
0,526 wie vergizzes dû der diernen dîn .
0,527 in disem ellende nû .
0,528 wie verlôs ich dich sô vruo .
0,529 unde wie kumes dû mir sô spâte .
0,530 zuo helfe unde zuo râte .
0,531 wie læs dû mich sô lange hier .
0,532 nû verzwîvelte ich doch nie .
0,533 an dînen sunelîchen triuwen .
0,534 durch keiner slahte riuwen .
0,535 der mîneme herzen gebe leste .
0,536 mîn geloube was ie veste .
0,537 an dîner hêren goteheit .
0,538 ich weiz wole daz dîn mennischheit .
0,539 an deme kriuze doch erstarp .
0,540 unde doch dîn goteheit niet verdarp .
0,541 unde noch in dîner drîvalt .
0,542 aller dinge dû hâst gewalt .
0,543 des ich durch nôt gelouben muoz .
0,544 sît mich dîn sælden berenter gruoz .
0,545 dich tragen tet . al sunder man .
0,546 unde âne sêr ouch dich gewan .
0,547 unde ich dich zôch . unde dû mîn pflæge .
0,548 unde dô dû in der krippen læge .
0,549 daz ein esel unde ein rint .
0,550 erkanten dich vüre gotes kint .
0,551 dâ bî ich krefte merke .
0,552 dîne gotelîche sterke .
0,553 nû zeige dîne kraft an mir .
0,554 unde nim hêrre mich hin zuo dir .
0,555 dâ dîne hêre majestât .
0,556 selp dritte dich aleine hât .”
0,557 der jâmer kunde mêren .
0,558 ire ougen zaher rêren .
0,559 durch grôze liebe daz geschach .
0,560 bî einer wîle sie gesach .
0,561 einen liechten klâren schîn .
0,562 daz niet schoeners kunde sîn .

0,563 den brâhte ein liechter engel dar .
0,564 vile wîzer danne ein snê gevar .
0,565 was sîn lûter klâr gewant .
0,566 einen palmen an der hant .
0,567 brâhte der liechte klâre gast .
0,568 der palmen rîser – – unde ire ast .
0,569 vile grüener wâren danne ein gras .
0,570 swaz der löuber dâr ane was .
0,571 der glesten was ein wunder .
0,572 ouch iegelich blat besunder .
0,573 unde liuhte alsam der sterre .
0,574 der vore dem tage verre .
0,575 durch die wolken dringet .
0,576 unde sîn licht der werlte bringet .
0,577 der engel vore Marîen stuont .
0,578 er tet mit vröuweden vröuwede kunt .
0,579 der vrouwen die in gerne sach .
0,580 mit süezen Worten er dô sprach .
0,581 “süezen gruoze unde hêren segên .
0,582 sagen ich dir von sînen wegen .
0,583 von des gruoze dir ein kint .
0,584 wart des himel unde erde sint .
0,585 daz ist dîn sun der dîn dâ beitet .
0,586 unde dîneme houbete hât bereitet .
0,587 eine wünnicliche krône .
0,588 in dem obersten trône .
0,589 dâ manic wünnicliche schar .
0,590 der engel unde der heiligen gar .
0,591 vröuwent sich der künfte dîn .
0,592 dû solt bî dîneme sune sîn .
0,593 von hiute ane deme dritten tage .
0,594 di mære ich dir von ime sage .
0,595 ich hân dir underwîlent . êr .
0,596 boteschaft gesaget mêr .”
0,597 sie sprach “daz ist mir wole bekant .
0,598 dû bist Gabriêl genant .
0,599 dû bræhte mir dô solichen gruoze .
0,600 daz ich dir nû gelouben muoze .”
0,601 er sprach “nû nim diz palmenrîs .
0,602 daz brach ich in dem paradîse .
0,603 zuo zierden dîner lîche .
0,604 daz man ez lobelîche .
0,605 vore dir hin zuo grabe trage .
0,606 an dînes lîbes endes tage .”
0,607 Maria zuo dem engel sprach .
0,608 swaz mir leides . ie geschach .
0,609 daz nimet nû ein ende .
0,610 des valte ich mîne hende .

0,611 unde nîgen deme gruoze .
0,612 der mich sô rehte suoze .
0,613 gegrûezet unde getrôst hât .
0,614 dâ von mîn trûren gar zergât .
0,615 mîn herze ist nû vrôwer danne . êr .
0,616 zuo dem engel sprach sie mêr .
0,617 “got der müeze mich gewern .
0,618 einer bete der ich geren .
0,619 daz alle sîne apostelen gar .
0,620 des tôdes mîn nemen war .
0,621 sô mir zuo sterbenne ist beschert .
0,622 unde sô mîn sêle hinnen vert .
0,623 daz mir die genâde geschehe .
0,624 daz ich sie lîphaft gesehe .
0,625 unde alle zuo deme tôde mîn .
0,626 umbe mich unde bî mir sîn .
0,627 unde sô man treget mich zuo grabe .
0,628 daz ich sie danne bî mir habe .”
0,629 des antwurte ir der engel lieht .
0,630 “Maria des en zwîvel niet .
0,631 dir sol dîn wille dâr an geschehen .
0,632 dû solt si alle bî dir sehen .
0,633 noch hiute an diseme selben tage .
0,634 waz wonders sie joch her trage .
0,635 von allen landen dâ sie sint .
0,636 sô gewaltic ist dîn kint .
0,637 sô behende unde sô gevüege .
0,638 der got den dû dâ trüege .
0,639 daz er wole vüeget swaz er wile .
0,640 ez sî lützel oder vile .
0,641 er sendet sîner apostelen schar .
0,642 noch hiute alle zuo dir gar .
0,643 die belîbent bî dir al di vrist .
0,644 biz daz dû begraben bist .”
0,645 zuo dem engel sprach si dô .
0,646 “ich bin dîner mære vrô .
0,647 eines dinges bite ich dich .
0,648 sprich dînen seggen über mich .
0,649 mir zuo volleiste .
0,650 daz die boesen geiste .
0,651 der tiuuele geselleschaft .
0,652 satanâs joch sîne kraft .
0,653 zuo mîneme ende müezen niet .
0,654 kumen vüre mîn angesihte .
0,655 unde daz ir keiner kume dar .
0,656 sô mîn sêle hinnen var .”
0,657 der engel sprach “dû hâst von gote .
0,658 des kneht ich bin unde ouch sîn bote .

0,659 entvangen sînen hêren segen .
0,660 der dîn muoz êwiclîche pflegen .
0,661 unde ist iemer bî dir .
0,662 niet en wæne des daz mir .
0,663 soliche gewalt gegeben sî .
0,664 daz ich dich müge machen vrî .
0,665 von des tiuvels anegesihte .
0,666 des gewaltes hân ich niet .
0,667 joch nieman anders haben mac .
0,668 wan der in dîneme lîbe lac .”
0,669 als der engel daz gesprach .
0,670 Maria sîn vürebaz niet en sach .
0,671 vore iren ougen er verswant .
0,672 die hêre maget alzehant .
0,673 lahte soliche kleider an .
0,674 als si zuo ireme tôde wolte hân .
0,675 si – nam die palme an di hant .
0,676 die ir von himel wart gesant .
0,677 unde gienc an einen berc dâ bî .
0,678 der heizet mons Oliveti .
0,679 mit reiner andâht si dô tet .
0,680 ûf zuo himel ire gebet .
0,681 si sprach “genâde lop unde êre .
0,682 müeze hiute unde iemer mêre .
0,683 got vater unde hêrre mîn .
0,684 gesaget unde gesungen sîn .
0,685 dîner gotelîchen kraft .
0,686 von aller der geselleschaft .
0,687 die ûf himel unde erden sîn .
0,688 daz dû der armen diernen dîn .
0,689 zuo himelrîche hâst begert .
0,690 des ich iedoch niet wære wert .
0,691 wan daz dîn grôz barmherzicheit .
0,692 mîn unwirde dâr an vertreit .
0,693 unde daz dû dîne tougen .
0,694 den ôren mîn unde ougen .
0,695 sô lobelîche hâst vüre brâht .
0,696 unde mîn sô schône hâst gedâht .
0,697 zuo ervûllenne mîne zuoversiht .
0,698 des was ich vollen wirdic niht .
0,699 wan sît des himels trône .
0,700 unde die engele alsô schoene .
0,701 unde swaz zuo himel ist bekliben .
0,702 vore dînen ougen müezen biben .
0,703 sô mac wole sîn ein mennische ervorht .
0,704 daz von der erden ist geworht .
0,705 dem niht genâden ist bereit .
0,706 danne von dîner milticheit .

0,707 niht anders ich berâten bin .
0,708 dîn milticheit gît mir gewin .
0,709 doch hân ich behalten wole .
0,710 noch mit ganzen triuwen als ich sol .
0,711 mîner kiuschicheite hort .
0,712 bî dem mich vant dîn kreftic wort .
0,713 daz in mir von der hêren vart .
0,714 zuo vleische unde ouch zuo bluote wart .
0,715 mîn geloube ist noch vile stæte .
0,716 des ich ie gelouben hæte .
0,717 daz dû bist ein gewârer got .
0,718 unde dîne kraft unde dîn gebot .
0,719 nieman mac gewenden .
0,720 ein got mit drîn genenneden .
0,721 der namen ist dechein der meist .
0,722 vater sun unde heiliger geist .
0,723 ir aller drîer meine .
0,724 daz bist dû got aleine .
0,725 in einer schoenen majestât .
0,726 gewaltic die niht endes hât .
0,727 wie wole dû misselingen .
0,728 kanst zuo vröuweden bringen .
0,729 swaz mir leides dô geschach .
0,730 dô ich dich vore mir hangen sach .
0,731 daz bringe mir zuo sælicheit .
0,732 als mir dîn engel hât geseit .
0,733 der mir zuo wizzenne hât gegeben .
0,734 nâch diseme lîbe ein vroelich leben .”
0,735 dô die reine stæte .
0,736 ire gebet volendet hæte .
0,737 daz got vile lieplîche entvienc .
0,738 wider heim zuo hûse si gienc .
0,739 daz was an eineme suntage .
0,740 Maria was in jâmers klage .
0,741 rehte umbe mitten morgen .
0,742 jâmers vile mit sorgen .
0,743 di maget in ire herze las .
0,744 daz sancte Johan niet bî ir was .
0,745 des tages an der selben – – – stunt .
0,746 gotes wort er tete kunt .
0,747 in dem lande zuo Ephesô .
0,748 dô vüegete ez got der guote alsô .
0,749 zuo des volkes anegesihte .
0,750 daz ein doneres blic unde lieht .
0,751 von himel unde ein nebel quam .
0,752 der sancte Johannen aldâ nam .
0,753 unde huop in ûf unde vuorte in .
0,754 gein Olivet den berc hin .

0,755 vüre ein hûs ûf ein gras .
0,756 dâ gotes muoter inne was .
0,757 er tet daz tor ûf unde gienc hin in .
0,758 vore vrôuweden weinte di küniginne .
0,759 dô sie ire neven kumen sach .
0,760 von rehter liebe daz geschach .
0,761 sie gruozen sich einander .
0,762 die schoenen palmen vant er .
0,763 durchliuhtic in der meide hant .
0,764 die palmen unde daz lichte gewant .
0,765 wîsete si Johanne .
0,766 unde sagete dem guoten manne .
0,767 wie si zuo tôde wære bereit .
0,768 als ir der engel hæte geseit .
0,769 si sprach “vile lieber mâc Johan .
0,770 nû gedenke doch dâr an .
0,771 von aneginne zuo dem orte .
0,772 der jæmerlîchen worte .
0,773 dâ mite mich Jêsus dir bevalh .
0,774 dô er an dem kriuze qual .
0,775 nû bedarf ich dîn iezuo wole .
0,776 wande ich hinnen scheiden sol .
0,777 daz ich dir wole bevolhen sî .
0,778 nû wis mir vriuntlîche bî .
0,779 die juden sprechent allen tac .
0,780 den lîp dâ Jêsus inne lac .
0,781 den wellen sie verbrinnen .
0,782 sô die sêle kume hinnen .
0,783 zuo pulver vile kleine .
0,784 beide vleisch unde gebeine .
0,785 dâ von hilf mîner lîche .
0,786 alsô gewærlîche .
0,787 vore den juden hin zuo grabe .
0,788 sô daz ich huote mite habe .”
0,789 aber sprach sie dô zuo im .
0,790 “mit triuwen dich mîn undernim .
0,791 heiz disen palmenstengel .
0,792 den mir brâhte der engel .
0,793 vore mîner bâren tragen hin .
0,794 biz daz ich begraben bin .”
0,795 er sprach “daz ich dich aleine .
0,796 âne die apostelen gemeine .
0,797 zuo grabe bestate .
0,798 unde ir niet bî mir hæte .
0,799 die dînen korper hêren .
0,800 zuo rehte solten êren .
0,801 daz si in zuo deme grabe truogen .
0,802 des kan ich niet gevüegen .

0,803 mit keinen êren eine .”
0,804 dô sprach die maget reine .
0,805 “Gabriêl mir hât geseit .
0,806 daz sie noch hiute sîn bereit .
0,807 alhier bî mir des warten ich .
0,808 des müeze got geweren mich .”
0,809 als sie daz wort dô vollensprach .
0,810 zuohant ire wille dô geschach .
0,811 si wâren alle gâhens dar .
0,812 von verren landen kumen gar .
0,813 wande ein wolken unde ein nebel .
0,814 vorne an des hûses gebel .
0,815 sie zuosamene brâhte .
0,816 als iz got gedâhte .
0,817 ir iegelîcher in kurzer wîle .
0,818 manic hundert mîle .
0,819 mit eineme sprunge dar quam .
0,820 grôz wunder sie des alle nam .
0,821 von welichen sachen oder wie .
0,822 got gesamenet hette sie .
0,823 mit vröuweden gruozten sie sich dô .
0,824 unde wâren zuo sehenne einander vrô .
0,825 ir iegelîcher begunde jehen .
0,826 wie wunderlîche in was geschehen .
0,827 dô sie bredigeten gotes wort .
0,828 einer hier der ander dort .
0,829 daz dâ ein wolken quæme .
0,830 unde in gâhens dannen næme .
0,831 von den liuten dâ er stuont .
0,832 unde gotes wort tete kunt .
0,833 unde hæte in in den lûften . dar .
0,834 gevuort des jâhen si alle gar .
0,835 sus quâmen zuosamene .
0,836 von sunder landen namen .
0,837 einer von Galicia .
0,838 der ander quam von India .
0,839 dâ die sunne under gât .
0,840 unde vürebaz niet gebûwes stât .
0,841 ir iegelîchez sunderlant .
0,842 belîbet von mir ungenant .
0,843 wen daz der verre unde ouch der nâh .
0,844 wâren gelîche schiere dâ .
0,845 iz was iedoch unbekant .
0,846 durch waz sie wæren dar gesant .
0,847 unde wisten niht der mære .
0,848 wer in dem hûse wære .
0,849 si suochten einen under in .
0,850 der sîn gebet zuo gote hin .

0,851 vüre sie alle tete .
0,852 daz er in gekündet hæte .
0,853 unde in daz bescheinte .
0,854 waz ire samenunge meinte .
0,855 der guote sancte Pêter sprach .
0,856 zuo sancte Paule unde jach .
0,857 daz er den anehap hæte .
0,858 unde got zuo êrsten bæte .
0,859 des solte er sîn der mêrre .
0,860 dô antwurte ime der hêrre .
0,861 “Pêter tuo di rede hin .
0,862 under iuch allen samet ich bin .
0,863 der minneste an der wirdicheit .
0,864 die der apostelen orden treit .
0,865 niet anders ich getouft bin .
0,866 wen daz mir mînen wilden sin .
0,867 gezemet hât di gotes kraft .
0,868 sô wârent ir ie alle tugenthafft .
0,869 von kindes aneginne .
0,870 in der gotes minne .
0,871 ir hât gedienet lange wole .
0,872 daz ich mich niet gelîchen sol .
0,873 zuo iuwerme keineme joch en mac .
0,874 wande ich allrêrest an den tac .
0,875 mit rehteme gelouben kumen bin .
0,876 gotes gewalt hât mir den sin .
0,877 gekêret in den rechten pfat .
0,878 den mîn geloube ie widertrat .
0,879 sô bist dû unser houbetman .
0,880 dû solt zuo rehte heben an .
0,881 unser aller wort zuo gote .
0,882 der oberste zwelivbote .
0,883 bist dû unde nideres dich .
0,884 dich hoeret got êr danne mich .
0,885 ich teilen mir ez unde ist ouch reht .
0,886 daz ich sî iuwer aller kneht .”
0,887 dô der guote Paulus .
0,888 gein gote sich erkante sus .
0,889 “ich en weiz” sprach einer under in .
0,890 “wie ich her kumen bin .
0,891 ich stuont dâ heime hiute .
0,892 unde predigete mînen liuten .”
0,893 des wurden die apostelen dô .
0,894 durch sînen diemuot alle vrô .
0,895 ez dûhte sie vile lobelich .
0,896 wande er allrêrest hatte sich .
0,897 bekêret von der heidenschaft .
0,898 si vielen alle samenthaft .

0,899 zuo der erden an die knie .
0,900 got mit andâht bâten sie .
0,901 daz er sie wizzen tete .
0,902 durch waz er sie hæte .
0,903 gesamenet alsô gâhens dar .
0,904 zuohant dâ wurden sie gewar .
0,905 eines sicheren boten der dâ quam .
0,906 unde sie von deme zwîvel nam .
0,907 in wart die wære mære kunt .
0,908 sie sâhen alle dâ zestunt .
0,909 bî in ein tor ûf tuon .
0,910 dâ unser vrouwen swestersun .
0,911 gegen in vüre die türe trat .
0,912 mit sorgen an der selben stat .
0,913 sîne gesellen vant er .
0,914 alle bî einander .
0,915 er gruozte sie besunder .
0,916 er sprach “nû hât iuch wunder .
0,917 wâr umbe ir nû zuo dirre zît .
0,918 sô gâhens hier gesamenet sît .
0,919 wistent ir es ir wæret vrô .”
0,920 er beschiet si schiere dô .
0,921 irere samenunge meine .
0,922 wie die maget reine .
0,923 den lîp verwandelen solte .
0,924 unde bî ir haben wolte .
0,925 ir aller geselleschaft .
0,926 zuo ireme tôde unde zuo ire graft .
0,927 des lobete got ir iegelich .
0,928 sie wurden alle vröuweden rîche .
0,929 er vuorte sie mit ime hin .
0,930 dâ die hêre küniginne .
0,931 die süeze klâre reine .
0,932 saz in deme hûse aleine .
0,933 dô si die hêrren kumen sach .
0,934 mit grôzen vröuweden si dô sprach .
0,935 “got tuot mir sîne helfe schîn .
0,936 ir sollet willekomen sîn .
0,937 mir unde deme grôzen gote .
0,938 der uns geschuof . des sicher bote .
0,939 mir hiute sagete iuweres kumennes zît .
0,940 nû saget mir wie ir kumen sît .”
0,941 ir iegelîcher begunde jehen .
0,942 sunder wie ime was geschehen .
0,943 “ich en weiz” sprach einer under in .
0,944 “wie ich her kumen bin .
0,945 ich stuont dâ heime hiute .
0,946 unde predigete mînen liuten .

0,947 dô wart ich schiere tougen .
0,948 vore ir aller ougen .
0,949 verzücket unde verswunden .
0,950 die lûfte mich verslunden .
0,951 die mich sô vuorten .
0,952 daz mîne bein geruorten .
0,953 stein oder stoc nie .
0,954 êr . ich mich umbe sach sô was ich hier .
0,955 nû muoz ich iuch di wârheit sagen .
0,956 solte mich ein snellez ros tragen .
0,957 den selben wec wider hin .
0,958 den ich her gevaren bin .
0,959 hiute in kurzen zîten .
0,960 ich muoste zehen wochen rîten .
0,961 hin wider oder mære .
0,962 vile snelle unde vile sære .
0,963 êr danne ich quæme ûf daz gras .
0,964 dâ ich hiute morgene was .”
0,965 “vrouwe” sprach dô dirre unde der .
0,966 “sus sîn wir alle kumen her .
0,967 in den lûften gevlogen .”
0,968 si sprach “sô bin ich unbetrogen .
0,969 von dem der iuch alsus her .
0,970 gesendet hâte nâch mîner ger .
0,971 des sî ime von mir armen maget .
0,972 genâde unde lop gesaget .
0,973 daz ich iuch nû gesehen mac .
0,974 êr . kume mînes endes tac .
0,975 iz ist kumen nû die zît .
0,976 daz mîneme lebene ende gît .
0,977 dâr umbe sît ir her gesant .
0,978 nû sît mit triuwen des gemanet .
0,979 daz ir biz an mînes tôdes zît .
0,980 wachent unde bî mir sît .
0,981 sô unser hêrre Jêsus Krist .
0,982 selbe her kumen ist .
0,983 der wile mîn selbe nemen war .”
0,984 “gerne” sprâchen sie alle gar .
0,985 swer mich nû vrâgen wolte .
0,986 ob er gelouben solte .
0,987 obe Maria wære .
0,988 vrô oder riuwebære .
0,989 riuwic niuwan umbe die nôt .
0,990 wande siu wole wiste vore ir den tôt .
0,991 oder vrô wande si wole wiste .
0,992 ire himelvarst zuo Kriste .
0,993 des kunde ich iuch wole bescheiden .
0,994 den zwîvel von den beiden .

0,995 swes der man mit herzen gert .
0,996 der vröuwet sich wirdet er es gewert .
0,997 Maria ires tôdes gerte .
0,998 got sie des gewerte .
0,999 daz ungemach niet sêre swiret .
0,1000 daz endelôse vröuwede gebiret .
0,1001 man mohte gerne leide hân .
0,1002 die zuo vröuweden kunde ergân .
0,1003 daz ist wâr . daz man den tôt .
0,1004 vürhten muoz vore aller nôt .
0,1005 swer den tôt ane sihet .
0,1006 der mac sich wole gevröuwen niht .
0,1007 Marîen was daz wole bekant .
0,1008 daz si den tôt dâ zuohant .
0,1009 des dritten tages solte liden .
0,1010 wie solte si daz dô vermîden .
0,1011 daz siu niet riuwic wære .
0,1012 gein des tôdes swære .
0,1013 ouch sach si wole die sælicheit .
0,1014 die nâch dem tôde ir was bereite .
0,1015 unde ir daz heil solte geschehen .
0,1016 daz sî ire kint muoste sehen .
0,1017 in sîner hôhen majestât .
0,1018 dâ man leit joch sorge hât .
0,1019 durch daz künfticlîche heil .
0,1020 wart ir vröuwede ein michel teil .
0,1021 mêrre durch daz êwige leben .
0,1022 danne ir trûrennes mohte geben .
0,1023 des tôdes kurzez ende .
0,1024 in disem ellenden .
0,1025 die hêre samenunge tete .
0,1026 williclîche ire vrouwen bete .
0,1027 sie wacheten an den dritten tac .
0,1028 daz ir keiner slâfes niet entpflac .
0,1029 in dem selben hûse ouch lâgen .
0,1030 ander liute die pflâgen .
0,1031 daz sie got lobeten sêre .
0,1032 durch die lobelîchen êre .
0,1033 die der süezen meide sun .
0,1034 mit sîner muoter wolte tuon .
0,1035 dô der dritte tac dô quam .
0,1036 unde prîmezît ein ende nam .
0,1037 dô ersûfteten sie alle gar .
0,1038 ane der aposteln schar .
0,1039 unde swaz dâ meide lâgen .
0,1040 wachennes die noch pflâgen .
0,1041 den die reine stæte .
0,1042 zuo wachenne dâr geboten hæte .

0,1043 die anderen alle in kurzer stunt .
0,1044 ein gemeine slâf bestuont .
0,1045 den vüegete der den êrsten man .
0,1046 sîn rippe slâfente ane gewan .
0,1047 zuo quam Marîen sun gevarn .
0,1048 mit maniger liechter engel schar .
0,1049 aldâ er sîne muoter sach .
0,1050 süezen gruoze er zuo ir sprach .
0,1051 “weset alles leides vrî .
0,1052 mîn vride mit iuch allen sî .”
0,1053 sie sprâchen alle gelîche .
0,1054 “got hêrre tugentrîche .
0,1055 lâz dîn erbermede ûf uns gân .
0,1056 als wir an dich gehoffet hân .”
0,1057 Maria sich dô nider lahte .
0,1058 vüre Jêsus vüeze si sich strachte .
0,1059 mit andâht sprach sie “kûninc hêr .
0,1060 gelobet sîs dû iemer mêr .
0,1061 mit drî namen lobelich .
0,1062 in einer goteheit doch gelîch .
0,1063 mit heilicheit unde mit gewalt .
0,1064 ûz einen mennischen ouch gezelt .
0,1065 ich biten dich durch dîne güete .
0,1066 daz mich dîn kraft dâ vore behüete .
0,1067 swanne sô ich hinnen varn .
0,1068 daz Sathanâs mit sînen scharn .
0,1069 mir niet bekome underwegen .
0,1070 dâ vore behüete mich dîn segen .
0,1071 daz mir daz heil geschehe .
0,1072 daz ich ir niet en sehe .
0,1073 der tiuvel alsô griuwelich .
0,1074 hêrre des gewer mich .”
0,1075 Jêsus sprach “nû lâ daz sîn .
0,1076 joch weist dû wole muoter mîn .
0,1077 dô ich ûf der erden lant .
0,1078 von dem himel wart gesant .
0,1079 durch aller der werlte sælicheit .
0,1080 daz satanâs mich niet vermeit .
0,1081 er quæme zuo mir daz ich in sach .
0,1082 unde er ouch mich . unde zuo mir sprach .
0,1083 unde er mich ouch versuochte genuoc .
0,1084 daz ich ime allez wole vertruoc .
0,1085 dô aber er gewar wart .
0,1086 daz im mîn kraft doch was zuo starc .
0,1087 überwunden vuor er dô von mir .
0,1088 er mac wole kumen ouch zuo dir .
0,1089 dû salt in wole gesehen .
0,1090 daz sal iedoch alsô geschehen .

0,1091 daz er dir niht geschaden mac .
0,1092 der sîner krefte ie oben lac .
0,1093 der sol selbe mit dir varen .
0,1094 der kan dich wole vore ime bewaren .
0,1095 sô daz dû in . unde er dich sihet .
0,1096 unde daz dû doch erschrickes niht .
0,1097 dâ von en salt dû niht sêre wegen .
0,1098 ganc muoter ûf dîn bette ligen .
0,1099 unde ende dînes lîbes vrist .
0,1100 als dû dem tôde schuldic bist .
0,1101 unde kum zuo mir vile schône .
0,1102 in mînes vateres trôn .
0,1103 rôsebluome kum zuo mir .
0,1104 kum schiere niht ervürhte dir .
0,1105 dich sol daz himelische her .
0,1106 âne aller boesen geiste wer .
0,1107 vüeren vrôuwedenlîche .
0,1108 in mînes vater rîche .”
0,1109 Maria suochte ire bettestat .
0,1110 got sie sîner genâden bat .
0,1111 sie strakte sich nider unde verschieet .
0,1112 ich wæne ie sterben baz geriet .
0,1113 âne daz der mennische starp .
0,1114 des sterben daz leben uns erwarp .
0,1115 die apostelen dâ zestunt .
0,1116 sâhen vüre Marîen munt .
0,1117 ire sêle in solicheme glanze varen .
0,1118 daz sie ire sehen muosten sparen .
0,1119 vore glaste der ire ougen sneit .
0,1120 swaz mennischen munde zungen treit .
0,1121 die kunden vollensprechen niht .
0,1122 daz durchliuhtic klâre licht .
0,1123 unde daz wünniclîche brehen .
0,1124 daz an der sêlen wart gesehen .
0,1125 die got vile minniclîche entvienc .
0,1126 aldâr sie ûz ire munde gienc .
0,1127 got bevalch die schoene sêle .
0,1128 deme erzengele sancte Michahêle .
0,1129 des wâren die engele alle vrô .
0,1130 zuo den apostelen sprach er dô .
0,1131 “nemet ir des lîbes war .
0,1132 der mich getruoc unde mich gebar .
0,1133 dort oben an der stete ende .
0,1134 zuo der rehten hende .
0,1135 gein der sunnen urhap .
0,1136 dâ vindet er ein niuwe grap .
0,1137 dâr solent ir sie tragen hin .
0,1138 unde legent mîne muoter dâr in .

0,1139 unde beitent mîn dâ bî dem grabe .
0,1140 biz ich die lieben sêle habe .
0,1141 brâht in mînes vateres rîche .
0,1142 sô kumen ich sicherlîche .
0,1143 des dritten tages zuo iuch dar .
0,1144 die wîle nemen mîn dâ war .
0,1145 ich wile mit der sêlen varn .”
0,1146 hine vuor der megede barn .
0,1147 sus vuorte ûf vröuwedenrîchen gewin .
0,1148 daz kint der muoter sêlen hin .
0,1149 der engele vröuwede wart sô grôz .
0,1150 ire singen durch die lûfte dôz .
0,1151 sus brâhten sie die sêle dar .
0,1152 dâ vröuweden guft ist âne sparn .
0,1153 drî reine meide nâmen .
0,1154 den reinen lîchamen .
0,1155 daz sie in betteteten zuo deme grabe .
0,1156 unde zugen ime die kleider abe .
0,1157 daz sie al blôz vore in lac .
0,1158 dâ wart der reine süeze smac .
0,1159 sô süeze unde alsô kreftic ouch .
0,1160 unde der wünniclîche rouch .
0,1161 der von deme lîbe wæjete .
0,1162 als der zuotriben hæte .
0,1163 des paradîses wurze gar .
0,1164 ire lîp was ouch sô liehtgevar .
0,1165 noch gelwer danne der sunnen brechen .
0,1166 daz sie die meide niet gesehen .
0,1167 mohten durch daz glasten .
0,1168 unde muosten si dô tasten .
0,1169 unde tastente alsô kleiden .
0,1170 sunder ougenweiden .
0,1171 unde dô si dâ ire tôtenkleit .
0,1172 der vrouwen hæten ane geleit .
0,1173 der gelwe klâr liechter schîn .
0,1174 liez aber dô sîn glesten sîn .
0,1175 nû mohten die juncvrouwen .
0,1176 ire vrouwen aber schouwen .
0,1177 dô sie zuo der bâren was bereit .
0,1178 alles dingens unde bekleit .
0,1179 die apostelen quâmen dar .
0,1180 unde nâmen ires antlitzes war .
0,1181 daz gap sô liljenvarwen schîn .
0,1182 daz niet schoeners konde sîn .
0,1183 unde alsô süeze was der smac .
0,1184 daz nieman daz volenden mac .
0,1185 vol vröuweden sie des wâren .
0,1186 sie huoben sie ûf die bâren .

0,1187 sie begunden ahten under in .
0,1188 wer die bâren trüege hin .
0,1189 daz wart gesetzet ouch alsus .
0,1190 daz Pêter unde Paulus .
0,1191 die bâren tragen solten .
0,1192 wan sie ez ouch – selbe wolten .
0,1193 Pêter sie zuo den houbeten vienc .
0,1194 Paulus zuo den vüezen gienc .
0,1195 die anderen giengen alle .
0,1196 mit hôhes lobes schalle .
0,1197 alumbe die bâren mit gevuoge .
0,1198 sancte Johan die palmen truoc .
0,1199 al singente vroeliche .
0,1200 vore der hêren liche .
0,1201 tet ir decheiner weinen schîn .
0,1202 daz mohte wole von vröuweden sîn .
0,1203 ein niuwe wunder in geschach .
0,1204 die hêre samenunge sach .
0,1205 in den lüften eine krône .
0,1206 die was wît unde schoene .
0,1207 dâr inne vlouc der engel schar .
0,1208 mit in die sunen alsô dar .
0,1209 daz ire singen unde ire schal .
0,1210 her nider in die stat hal .
0,1211 der apostelen sanges dôz .
0,1212 was ouch sô süeze unde sô grôz .
0,1213 daz die liute alle .
0,1214 von deme süezen schalle .
0,1215 sich wunderten waz in wære .
0,1216 sie liefen ûz unde vrâgeten mære .
0,1217 von dem daz süeze singen .
0,1218 mohte dâ erklingen .
0,1219 under in ein jude stuont .
0,1220 der tet in allen die mære kunt .
0,1221 er sprach Maria die ist tôt .
0,1222 unde hânt mit sange dise nôt .
0,1223 die apostelen die sint hier .
0,1224 unde gênt dâ jôlente umbe sie .
0,1225 der juden bischof lief aldar .
0,1226 unde die anderen alle gar .
0,1227 die bî ime wâren . der was genuoc .
0,1228 sie wolten stellen ungevuoc .
0,1229 sie begunden dar nâhen .
0,1230 die bâren sie ersâhen .
0,1231 unde erhôrten dâ bî süezen sanc .
0,1232 mannegelîch dar nâher drang .
0,1233 die apostelen alle wâren .
0,1234 alumbe unde umbe die bâren .

0,1235 vile ordenliche gestellet .
0,1236 einander bî gesellet .
0,1237 daz was zuo sehenne schône .
0,1238 dâr zuo die süeze dône .
0,1239 der liute unde maniges engeles .
0,1240 unde ouch des palmenstengels .
0,1241 zierde unde schoenheit .
0,1242 gâben michel herzeleit .
0,1243 den juden die daz sâhen .
0,1244 dô gewan in allen gâhen .
0,1245 der juden bischof zornes muot .
0,1246 daz mære dûhte in niergen guot .
0,1247 mit îlenne er zuo der bâren lief .
0,1248 in sîneme zorne er lûte rief .
0,1249 “nû sehet wâ man hine treit .
0,1250 den korper von dem wir manic leit .
0,1251 unde allez unser geslehte hât .
0,1252 ob der alsus dâ hine gât .
0,1253 daz wir es an ime niht rechen .
0,1254 sô mac man iemer sprechen .
0,1255 von unseren grôzen schanden .”
0,1256 die bâren er mit den handen .
0,1257 wolte nider hân gezogen .
0,1258 die hende biz an den ellenbogen .
0,1259 ime zuohant verlemet wâren .
0,1260 unde gehiengen an der bâren .
0,1261 daz er mit keinen dingen .
0,1262 sich mohte her abe gewinnen .
0,1263 mit lûter stimme er dô schrei .
0,1264 “hêrre Pêter heiâ hei .
0,1265 nû hilf von dirre pînen mir .”
0,1266 lâs dir gedenken wie ich dir .
0,1267 gevriste zwêne mâl dînen lîp .
0,1268 dô der cananischen wîp ..
0,1269 dich in deme garten ane sprach .
0,1270 sô übellîche unde jach .
0,1271 dû wæres Jêsus jungeren ein .
0,1272 dô sprach ich alles vûre dich nein .
0,1273 man hette dich anders gevangen .
0,1274 unde bî Jêsus ouch erhangen .
0,1275 nû loese ouch mich von dirre quâle .
0,1276 lîp unde guot ich alzemâle .
0,1277 wile dir in dîne genâde geben .
0,1278 unde iemer mêr dîn râtes leben .
0,1279 Pêter sprach “ich en mac dir niet .
0,1280 vergelten mennischlich geschiht .
0,1281 mit der gotelîchen kraft .
0,1282 dû bist von gotes gewalt behaft .

0,1283 dâr zuo kan nieman niht getuon .
0,1284 danne Jêsus dirre meide sun .
0,1285 wilt dû an den gelouben hân .
0,1286 sô maht dû ledic hinnen gân .”
0,1287 dô sprach der juden meister . “waz .
0,1288 hülfe mich . ich weiz wole daz .
0,1289 unser Jêsus niht geruochet .
0,1290 wir hân uns selben doch vervluochet .
0,1291 wir sprâchen wider sîne hulde .
0,1292 wir wolten daz sînes tôdes schulde .
0,1293 solte ûf uns unde unser kinder gân .
0,1294 wie mohte ich danne sîne hulde hân .”
0,1295 Pêter sprach “dû en salt is niet ruochen .
0,1296 wan wizze ez . daz selbe vluochen .
0,1297 gotes hulde nieman mac berouben .
0,1298 danne den der in dem ungelouben .
0,1299 iemer wile belîben .
0,1300 dem muoz der vluoch beklîben .
0,1301 wilt dû mit uns gelouben hân .
0,1302 sô mac dîn pîne wole zuorgân .”
0,1303 die wîle stuont die bâre al stille .
0,1304 er sprach “ez ist mîn vester wille .
0,1305 daz mîn geloube stæte sî .
0,1306 an den der hât die namen drî .
0,1307 der dâ heizet Jêsus Krist .
0,1308 des muoter dise maget ist .”
0,1309 als er daz dâ vollensprach .
0,1310 zuohant ein zeichen dâ geschach .
0,1311 die hende er von der bâren nam .
0,1312 ime was doch wê unde was noch lam .
0,1313 zuo sancte Pêter sprach er mêr .
0,1314 “hîlf hêrre mir ist noch harte wê .”
0,1315 er sprach – – – “wole nidere an die knie .
0,1316 unde küsse die bâren hier .
0,1317 von gotes gewelte hilfe ich dir .
0,1318 ich sprechen vore nû sprich nâch mir .
0,1319 ich gelouben an Jêsum Krist .
0,1320 der gotes sun von himel ist .
0,1321 des dise hêre maget genas .
0,1322 die maget beleip unde maget was .
0,1323 des mennischheit ane deme kriuze erstarp .
0,1324 daz doch sîn goteheit niet verdarp .
0,1325 er wart begraben unde erstuont .
0,1326 des dritten tages wole gesunt .
0,1327 die hellen er brach gewalticliche .
0,1328 unde vuor ûf in sînes vateres rîche .
0,1329 unde daz dâ nieman anders ist .
0,1330 gewaltic got danne Jêsus Krist .”

0,1331 “des gelouben ich” sprach des juden munt .
0,1332 dâ wart er alzehant gesunt .
0,1333 des sagete er gote grôzen danc .
0,1334 daz ime dâ sô wole gelanc .
0,1335 von ime selben sprach er mêr .
0,1336 daz sîne buoch der alten ê .
0,1337 des gæben wâr urkünde .
0,1338 daz man dâr an geschriben vûnte .
0,1339 geschriben wære mære .
0,1340 daz Maria wære .
0,1341 ein schoene reine templum .
0,1342 dâ got selbe aleine .
0,1343 inne wolte wesen .
0,1344 daz hæte er dicke gelesen .
0,1345 des wâren die apostelen vrô .
0,1346 sancte Pêter sprach aber dô .
0,1347 “ganc zuo Johanne der dort stât .
0,1348 unde nim die palmen die er hât .
0,1349 die ist von himel her gesant .
0,1350 unde kêr gein der stat zuohant .
0,1351 dâ vindes dû vile liute blint .
0,1352 junc unde alt swaz ir sint .
0,1353 wande sie nâch dirre bâren .
0,1354 vore die stat geloufen wâren .
0,1355 daz rach der liechten engel schar .
0,1356 daz sie verblinden alle gar .
0,1357 swer aber nû gelouben wile .
0,1358 ir sî lützel oder vil .
0,1359 den salt dû algelîche .
0,1360 die ougen bestrîchen .
0,1361 mit der palmen aste .
0,1362 sô sihet er alsô vaste .
0,1363 als dâ vore oder baz .
0,1364 von gotes genâden hât er daz .
0,1365 swer wider dem gelouben strebet .
0,1366 tâlanc er biz naht gelebet .”
0,1367 der jude dâ die palmen nam .
0,1368 hin wider in die stat er quam .
0,1369 die liute vant er alle blint .
0,1370 mit jâmer weinente als kint .
0,1371 sie riefen dicke “wê unde wê .
0,1372 wê uns hiute unde iemer mêr .
0,1373 wie hân wir blinde gurren .
0,1374 als die von Sodomorren .
0,1375 gotes zorn erworben .
0,1375a –[...]
0,1376 durch ire grôz unreinicheit .
0,1377 die selbe plâge ist uns bereit .

0,1378 den selben zorn hân wir entvngen .”
0,1379 dô quam ire prinze gegangen .
0,1380 unde sagete wie iz ime ergangen was .
0,1381 wie er erlamete unde genas .
0,1382 unde sagete in albesunder .
0,1383 die zeichenlîchen wunder .
0,1384 unde dâr nâch von dem palmen dô .
0,1385 dâ von die blinden wurden vrô .
0,1386 er sprach “geloubent ir daz Krist .
0,1387 Marîen sun der meide ist .
0,1388 wellt ir in deme gelouben wesen .
0,1389 sô müget ir alle wole genesen .
0,1390 daz touc iuch niet zuo entbernne .”
0,1391 sie sprâchen alle “gerne .
0,1392 sol unser geloube an ime bestên .”
0,1393 er begunde in nâher gên .
0,1394 die palmen er in ûf die ougen streich .
0,1395 daz blinden in zuohant gesweich .
0,1396 unde gewunnen ire gesiht wider .
0,1397 vünve vielen tôt dâr nider .
0,1398 sam die schelmen ûf die erden .
0,1399 sie en wolten niht geloubic werden .
0,1400 als der schelme die gesluoc .
0,1401 der jude die palmen wider truoc .
0,1402 unde antwurte sancte Paule sie .
0,1403 er sagete in allen rehte wie .
0,1404 in der stat ergangen was .
0,1405 wie die geloubige diet genas .
0,1406 unde die vünve tôt gelâgen .
0,1407 die des gelouben niht en pflâgen .
0,1408 die apostelen alle gar .
0,1409 unde di geloubigen scharn .
0,1410 huoben aber ire süezen sanc .
0,1411 daz ez in den himel klanc .
0,1412 die gotes holden vrouweten sich .
0,1413 unde truogen hin die selben lîch .
0,1414 als in daz got gebôt zuo grabe .
0,1415 mit vröuweden unde mit ungehabe .
0,1416 mit liebe unde mit leide .
0,1417 die hâten sie dâ beide .
0,1418 sie vröuweten sich ire sælicheit .
0,1419 unde was in ouch daz scheiden leit .
0,1420 sie lahten sie in ein niuwe grap .
0,1421 als in daz gebot got selbe gap .
0,1422 alumbe daz grap ir aller stên .
0,1423 mohte âne weinen niht ergên .
0,1424 von grôzen vröuweden daz ergienc .
0,1425 daz doch ein jâmer undervienc .

0,1426 daz grap unde ouch die reine .
0,1427 mit eineme grôzen steine .
0,1428 bedahten sie ez der bî in lac .
0,1429 biz an den dritten tac .
0,1430 alumbe daz grap sie lâgen .
0,1431 sô des wachennes pflâgen .
0,1432 dô quam des dritten tages schîn .
0,1433 ouch Jêsus zuo der muoter sîn .
0,1434 iet quæme als er in gehiez .
0,1435 die er hier nidene bî in liez .
0,1436 jâ sîn wort fallieret niht .
0,1437 swaz er geheizet daz geschiht .
0,1438 woy wie der meide barn .
0,1439 durch die lûfte quam gevarn .
0,1440 mit gewalticlichem her .
0,1441 den nieman mohte erbieten wer .
0,1442 erzengel unde engele dar .
0,1443 brâhten manige liehte schar .
0,1444 dar quam mit vrôuweden offenbâr
0,1445 vile witewen unde meide klâr .
0,1446 bischove unde bîhtære .
0,1447 unde manic schoene martelære .
0,1448 patriarchen unde prophêten .
0,1449 die stuol zuo himel hæten .
0,1450 mit sancte Michahêle .
0,1451 der vuorte Marîen sêle .
0,1452 der engel was ein wunder .
0,1453 mit maniger storîen sunder .
0,1454 die sunge alle samet hôhe .
0,1455 “gloria in excelsis deo .”
0,1456 von diseme sange lobelich .
0,1457 die zwelifboten vrôuweten sich .
0,1458 dô sie quâmen über daz grap .
0,1459 süezen gruoze in Jêsus gap .
0,1460 dâ bî wart vrôuweden vile bekant .
0,1461 den apostelen alzehant .
0,1462 sie vielen nider in kriuzes wîse .
0,1463 unde sprâchen “hôhes lobes prîs .
0,1464 sî dîner hôhen kraft gesaget .
0,1465 dô dû zuo dirre werden maget .
0,1466 sô lobelîche kumen bist .”
0,1467 dô sprach der hêrre Jêsus Krist .
0,1468 “dô ich von himel wart gesant .
0,1469 als iuch allen ist bekant .
0,1470 her nider ûf die erden .
0,1471 unde mennische solte werden .
0,1472 durch allez mennischlich künne .
0,1473 daz ich ez wider gewünne .

0,1474 von der hellewîze nôt .
0,1475 unde ich ire êwiclîchen tôt .
0,1476 mit mîneme tôde machete lôs .
0,1477 zuo einer muoter ich erkôs .
0,1478 dise maget gehiure .
0,1479 vore aller créatiure .
0,1480 wande sie zuo muoter mir gezam .
0,1481 die mennischheit ich von ir genam .
0,1482 ich bin ire vleisch unde ire bluot .
0,1483 waz dunket iuch danne alle guot .
0,1484 ob ich sie lâze ligen hier .
0,1485 oder mit mir vüeren sie .”
0,1486 sie sprâchen alle gemeine .
0,1487 “sît diz vleisch unde diz gebeine .
0,1488 daz dû zuo muoter hæte erkoren .
0,1489 hât dich getragen unde geboren .
0,1490 unde dû von ir gelîbet bist .
0,1491 unde sie von dir geheiliget ist .
0,1492 unde sît ein vleisch unde ein bluot .
0,1493 sô dunket uns daz niemer guot .
0,1494 daz die wûrme unreine gar .
0,1495 daz vleisch ezzen daz dich gebar .
0,1496 iz læge gar zuo nâhe dir .
0,1497 ûf unsern orden teilen wir .
0,1498 daz dû âne unterscheiden .
0,1499 lîp unde sêle beide .
0,1500 in dînes vateres paradîs .
0,1501 vüeren solt gelîcher wîs .
0,1502 als dû mit dîner hêren kraft .
0,1503 nâch dîneme tôde lîphaft .
0,1504 ûf erstüente von deme grabe .
0,1505 des selben ganc ouch ir niet abe .”
0,1506 dô sprach der lieben meide sun .
0,1507 ich wile ez willicliche tuon .
0,1508 daz ir mir hier geteilet hât .
0,1509 iuwer urteil unde iuwer rât .
0,1510 ist gereht des bin ich vrô .
0,1511 zuo Gabriêl sprach er dô .
0,1512 “hep ûf den stein . unde lâz mich schouwen .
0,1513 mîne muoter iuwer vrouwen .
0,1514 die der – boteschaft konde wern .
0,1515 sie solte maget ein kind geberen .”
0,1516 Gabriêl der engel lieht .
0,1517 sûmete gotes gebot niht .
0,1518 er warf den stein vile gâhens abe .
0,1519 dô quam zuohant ûz dem grabe .
0,1520 sô liechter schîn sô süezer smac .
0,1521 dâ nieman von gesprechen mac .

0,1522 “stant ûf muoter minniclich .”
0,1523 sprach Jêsus “die sô dicke mich .
0,1524 hât ûf gehaben triuwelîche .
0,1525 dô wâren wir arm nû sîn wir rîche .
0,1526 kum her mînes lîbes künne .
0,1527 kum her mîn himelwünne .
0,1528 nû stant ûf al mînes herzen ger .
0,1529 mîn spiegelglas . stant ûf kum her .
0,1530 kum her mîn reine kiusche zuht .
0,1531 dich eischet dînes lîbes vruht .
0,1532 mit aller sîner engel schar .”
0,1533 sancte Michahêl trat nâher dar .
0,1534 die klâre sêle er dar gap .
0,1535 deme lîbe wider in daz grap .
0,1536 der heilicgeist tet dâ zestunt .
0,1537 dem tôten lîbe leben kunt .
0,1538 ûf rihtete sich die maget zuohant .
0,1539 ir wart vile schiere dâ bekant .
0,1540 die vrôuweden rîche mære .
0,1541 daz ire sun dâ selbe wære .
0,1542 vile schiere die reine sûeze .
0,1543 ime viel an sîne vûeze .
0,1544 unde lobete sîne hôhe gewalt .
0,1545 unde sîne kraft sô manicvalt .
0,1546 die er begangen hette an ir .
0,1547 er huop sie ûf . “kum her zuo mir .”
0,1548 sprach er “vile liebe trûte muoter mîn .
0,1549 dû solt des himels vrouwe sîn .
0,1550 kum her zuo mir sô nâhe .
0,1551 daz ich dich umbevâhe .”
0,1552 sîn hêrschaf des gelustete .
0,1553 daz er sie minniclîche kuste .
0,1554 unde bevalch sancte Michahêle .
0,1555 beide lîp unde sêle .
0,1556 die er vile vrôuwedenlîche entvienc .
0,1557 allrêrest ez an die vrôuwede gienc .
0,1558 swaz ich von jâmer hân gesaget .
0,1559 von dem sune unde von der maget .
0,1560 dô sie vore deme kriuze stuont .
0,1561 dô was in beiden jâmer kunt .
0,1562 unde herziclîche leide .
0,1563 des wâren sie nû beide .
0,1564 mit vrôuweden hier ergetzet sô .
0,1565 des manic engel wart dâ vrô .
0,1566 ûf vuor di hêre trinitas .
0,1567 unde swaz dâ zuo himel êren was .
0,1568 der was mit dirre verte wole .
0,1569 die lûfte wurden schalles vol .

0,1570 unde dâr zuo himel unde erden .
0,1571 dô sie di maget werden .
0,1572 zuo himel condewierten .
0,1573 waz engele dâ schantierten .
0,1574 mit wünnicliche schalle .
0,1575 unde die heiligen albetalle .
0,1576 die wolken tâten sich von ein .
0,1577 swaz himelglastes . ie . geschein .
0,1578 von sterren mânen sunnen .
0,1579 swaz die lichtetes . ie . gewonnen .
0,1580 daz was allez gar ein niht .
0,1581 dâ wider daz si nû ire lieht .
0,1582 brâhten dar in widerstrît .
0,1583 gein der hêren hôchgezît .
0,1584 swaz ûf deme himele was beliben .
0,1585 daz quam allrêrest her abe getriben .
0,1586 von des himels trône .
0,1587 manige liehte krône .
0,1588 der meide houbet truogen .
0,1589 die îlten dar luogen .
0,1590 an die sûeze klâr maget .
0,1591 von der in was sô vile gesaget .
0,1592 unde entviengen sie vile suoze .
0,1593 mit sange unde ouch mit gruoze .
0,1594 mit lobelîcher krîe .
0,1595 “sîs willekomen Maria .”
0,1596 wart dicke dâ erklungen .
0,1597 einander sie sich drungen .
0,1598 daz sie al ire vrouwen .
0,1598a –[...] schouwen
0,1599 wande sie der reinen stæten .
0,1600 kûme erbiten hæten .
0,1601 der sûeze got vile guoter .
0,1602 sus brâhte er sîne muoter .
0,1603 die minniclichen werden .
0,1604 ûf den himel von der erden .
0,1605 dâ die vile tugentrîche .
0,1606 schône unde wünnicliche .
0,1607 mit himelische sange .
0,1608 von schoenen anevange .
0,1609 gegrüezet unde entvungen wart .
0,1610 an des himels învart .
0,1611 von den heiligen überal .
0,1612 allrêrest huop sich ein niuwer schal .
0,1613 unde manic vrôuweden rîcher dôn .
0,1614 dô sie got vuorte in sînen trôn
0,1615 zuo sîner zeswen hende .
0,1616 dâ vrôuwede hât kein ende .

0,1617 dô brâhten ime die engele dar .
0,1618 eine krône liehtgevar .
0,1619 dâ kroenete er die muoter sîn .
0,1620 er sprach “nû wis ein küniginne .
0,1621 alhier gewalticliche .
0,1622 in mîneme himelrîche .
0,1623 unde sich des vûrebaz ûfe mich .
0,1624 swes dû mich bites daz tuon ich .
0,1625 dû maht mich biten waz dû wilt .
0,1626 der süntære vrideschilt .
0,1627 salt dû muoter gein mir wesen .
0,1628 des manic sêle mac genesen .”
0,1629 dô bôt sich die sûeze .
0,1630 an ires sunes vûeze .
0,1631 unde entvienc di himelischen krône .
0,1632 in deme hôhen trône .
0,1633 dâ got in sîner majestât .
0,1634 mit sîner lieben muoter hât .
0,1635 beide vrôuwede unde wûnne .
0,1636 swer gerne dâ gewûnne .
0,1637 stuol unde gesitze .
0,1638 der pflege solicher witze .
0,1639 daz er die sûeze reine .
0,1640 mit rehtem herzen meine .
0,1641 unde sî ir dienstlîchen bî .
0,1642 ime vûeget ouch wole daz er sî .
0,1643 reine unde kiusche .
0,1644 âne allez valschez getiusche .
0,1645 unde habe sie in dem muote .
0,1646 sô hilfet ime die guote .
0,1647 daz er des dicke wirdet gewert .
0,1648 daz er zuo rehten dingen begert .
0,1649 swer dienet nâch ire minnen .
0,1650 der mac an ir gewinnen .
0,1651 hôher minnen gegen kouf .
0,1652 der werlte minnen umbelouf .
0,1653 daz ist ein valscher trûgenlist .
0,1654 nû ob dû ein minnære bist .
0,1655 dû sîst wîp oder man .
0,1656 sich wie diu minne lônē kan .
0,1657 minnes dû ein reine wîp .
0,1658 sô muost dû elten dînen lîp .
0,1659 iemer mêr vergebene .
0,1660 mit sorclicheme lebene .
0,1661 wande sie dich niemer des gewert .
0,1662 ires lasteres des dîn herze gert .
0,1663 dîn riuwen stêt gein wîbe twerhes .
0,1664 swanne dû ires lasters geres .

0,1665 dû lobes sie zuo prîse .
0,1666 sie sî hövisch unde wîse .
0,1667 sie sî edel unde guot .
0,1668 unde habe tugenthaften muot .
0,1669 sie sî reine unde stæte .
0,1670 unde woltes doch daz sie træte
0,1671 ûz aller stæticheit .
0,1672 durch dîn einez herzeleit .
0,1673 ist sie danne reine .
0,1674 sô belîbes dû aleine .
0,1675 in dem leide iemer mêr .
0,1676 sus minnes dû dîn herzesêr .
0,1677 wan wile siu êren walten .
0,1678 siu muoz sich reine halten .
0,1679 nû sî daz wole daz sie – joch sî .
0,1680 stætēs wîbes vuoren – vrî .
0,1681 sô daz sie durch dînen rât .
0,1682 des wîbes êre vrîe hât .
0,1683 zuohant versihes dû dich dâ .
0,1684 sie pflege ouch minne anderswâr .
0,1685 des muost dû sorgen iemer mêr .
0,1686 sich sô en wart dir nie sô wê .
0,1687 sus ist dir von minnen bereit .
0,1688 gein eineme liebe tûsent leit .
0,1689 nû prüeve ouch sô ez alumbe gât .
0,1690 waz endes zweier minne hât .
0,1691 sich muoz die liebe an beiden .
0,1692 mit herzeleide scheiden .
0,1693 alsus verdienet ir hier unde dort .
0,1694 des lîbes unde der sêlen mort .
0,1695 daz ist die arme zuoversiht .
0,1696 ei sælic mennische tuo sô niht .
0,1697 lâz von der minne die dich lât .
0,1698 sunder helfe sunder rât .
0,1699 unde minne dâ dû wirdes gewert .
0,1700 alles des dîn herze gert .
0,1701 an aller slahte leit .
0,1702 als ich dich wole bescheide .
0,1703 wilt dû an minnen hân gewin .
0,1704 sô kêre allen dînen sin .
0,1705 an hôhe werde minne .
0,1706 unde minne eine kûninginne .
0,1707 die ouch dîner minnen gert .
0,1708 unde die dich minnennes wider wert .
0,1709 sie gesweich ire vriunden nie .
0,1710 swer si minnet den minnet sie .
0,1711 ire minne ist vile gemeine .
0,1712 unde stæte unde reine .

0,1713 sie ist edele unde guot
0,1714 zühtic unde wolegemuot .
0,1715 kiusche unde minniclich .
0,1716 milte unde tugenderîche .
0,1717 unde ob si danne sô schoene sî .
0,1718 jâ quæmes dû ir alsô nâhe bî .
0,1719 daz dînen ougen würde erkant .
0,1720 ire minnester vinger vone ire hant .
0,1721 der durchliuhtige klâre schîn .
0,1722 tæte dir daz herze dîn .
0,1723 gâhes von einander gân .
0,1724 unde lachenlich offene stân .
0,1725 von vröuweden . unde von wünnen .
0,1726 same die rôse gein der sunnen .
0,1727 des morgenes in deme touwe .
0,1728 nû sich danne obe die vrouwe .
0,1729 zuo schouwenne iet wære wünniclich .
0,1730 dem sie gestaten wolte an sich .
0,1731 muozicliche zuo sehenne .
0,1732 dem kunde niemer baz geschên .
0,1733 der süezen minnærinne .
0,1734 der diene die minne .
0,1735 dû en darft niemer dînen lîp .
0,1736 durch sie als durch ein ander wîp .
0,1737 gewâgen in turneie .
0,1738 noch gesingen niuwen reie .
0,1739 unde wirdet dir ouch anders holt .
0,1740 âne silber unde âne golt .
0,1741 ich wile dich wîsen alse wie .
0,1742 tuo anders niet durch sie .
0,1743 wen daz dû doch tætes .
0,1744 ob dû gerne êre hætes .
0,1745 lâz allez valsch getiusche .
0,1746 unde wis ouch niet unkiusche .
0,1747 wan daz tuot deme lîbe wê .
0,1748 unde dîner sêlen noch mêr .
0,1749 unde nimet dir noch mêre .
0,1750 dîn guot unde ouch dîn êre .
0,1751 die vier dinc sweches dû dâ mite .
0,1752 hâst dû unkiusche site .
0,1753 obe dechein bredigære .
0,1754 dir sagete waz sünde wære .
0,1755 sô ist sünde unde valsche meine .
0,1756 doch sô gar unreine .
0,1757 daz dû ez selbe erkennen muost .
0,1758 sô dû sünticliche tuost .
0,1759 unde saget dir dîn herze daz
0,1760 liezes dû ez dû tætes baz .

0,1761 wilt dû von minnen lôn entvâhen .
0,1762 sô maht dû gerne durch sie lân .
0,1763 daz dir selben schaden tuot .
0,1764 daz dir êre unde guot .
0,1765 sêle unde lîp die viere .
0,1766 dir benomen hât vile schiere .
0,1767 swer wider disen vieren strebet .
0,1768 der lebet niet er widerlebet .
0,1769 unde mac die schoenen vrouwen .
0,1770 niemer mêr beschouwen .
0,1771 die süezen minnærinne .
0,1772 des himels küniginne .
0,1773 unde den süezen minnære .
0,1774 der guot zuo minnenne wære .
0,1775 dem alle minne ist wole bekant .
0,1776 der durch minne wart gesant .
0,1777 von dem himel ûf die erden .
0,1778 unde durch minne wolte werden .
0,1779 ein lebenlîche minnen vruht .
0,1780 von des minnen wart bedruht .
0,1781 der minnicliche meide schôz .
0,1782 des manic minnære sît genôz .
0,1783 in twanc der minnen meisterschaft .
0,1784 daz er von starker minnekraft .
0,1785 sich in der engen maget beslôz .
0,1786 dem himel unde erde was ze grôz .
0,1787 sus wart die minnente minne .
0,1788 der süezen minnærinne .
0,1789 zuo rehter minnen minniclich .
0,1790 des . slôz die minne in minne sich .
0,1791 daz von der minnen übevluote .
0,1792 ein wort wart vleisch unde bluot .
0,1793 dâ von der minnær wart geboren .
0,1794 der durch die minne truoc den dorn .
0,1795 ûf deme houbete zuo einer krône .
0,1796 er ranc nâch minnen lône .
0,1797 durch minne er wart gevangen .
0,1798 unde durch minne ouch erhangen .
0,1799 durch der rehten minne ger .
0,1800 liez er den blinden man sîn sper .
0,1801 durch sîne sîten stechen .
0,1802 die minne tet in sprechen .
0,1803 daz in begunde dürsten .
0,1804 dô truoc man dar dem vürsten .
0,1805 galle unde ezzich under ein .
0,1806 sie wânt en trinkan iesche nein .
0,1807 sîn durst en iesch decheinen tranc .
0,1808 die minne in anders dürsten twanc .

0,1809 nâch der kristenheite .
0,1810 der er vile kûme erbeitte .
0,1811 durch minnen er sînen lîp verlôs .
0,1812 unde an deme kriuze sterben kôs .
0,1813 waz mohte der minnærinne sun .
0,1814 durch die minne mêr getuon .
0,1815 wen daz er sîn hêrez leben .
0,1816 durch dich geruochte dem tôde geben .
0,1817 sich deme diene den minne .
0,1818 unde sîne minnærinne .
0,1819 die minnen lobes ist bereit .
0,1820 wande sie der minnen slüzzel treit .
0,1821 dâ mit ire sun die hellen entslôz .
0,1822 dû vindes an ir helfe grôz .
0,1823 vüre wen sie bitet der ist gewert .
0,1824 ire sun tuot allez daz si gert .
0,1825 swaz sie sprichet daz sal sîn .
0,1826 “gerne liebe muoter mîn .”
0,1827 sprichet er unde anders niet .
0,1828 “swaz dû gebiutes daz geschiht .”
0,1829 den minnær unde die minnærinne .
0,1830 den küninc . unde die küniginne .
0,1831 solt dû minnen daz ist mîn rât .
0,1832 der werlte minne schiere zuorgât .
0,1833 ire liebe herziclichez leit .
0,1834 unde anders niet ane dem ende treit .
0,1835 nû helfe uns der sich an den tôt .
0,1836 durch unser alle minne bôt .
0,1837 daz wir alsô geminnen in .
0,1838 daz die hêre küniginne .
0,1839 die minnicliche süeze .
0,1840 uns danne helfen müeze .
0,1841 herzeliebe sunder leiden .
0,1842 sô sich die sêle sal scheiden .
0,1843 von dem armen lîchamen .
0,1844 in gotes namen . âmên .